

Enn dufte Weihnachtsmarkt

Om ersde Advent so geeche fünf sinn merr all sesomme uff de Weihnachtsmarkt gonge, de Schorsch, de Karl unn ich, unn nodierlich warn unser Meedcher aach debei.

Es war schee voll vor de Marktständ, unn deshalb hawwe merr uns erstemol hinnerm Musikverein mitte uff de Platz gestellt unn hawwe dene zugeheert. Grad als die Musiker die Note gewend unn e onner Stick gesucht hawwe, hält de Schorsch die Nas in die Luft, macht soi Aache zu unn lässt enn Seufzer los: Ach wie gut – Zimtstern, Lebbkuche, gebrannte Mondele, Christstolle, Kerze unn Tannezweiche - wassen Duft! Jetz werds Weihnachte!

Doo stumpden soi Fraa, dess Kättche: Schorsch, du hosd doch de Schnuppe – unn dess mett de Zimtstern unn so hosde vorhin im Adventskalenner gelese – hier richts onnerst!

In dem Aacheblick kimmt de Hubert uff uns zu, mett so was wie em Ponnekuche in de Hond, beisst sich grad e Stick defoo ab unn sacht mettem volle Mund: Na, ihr drei Musketiere, heute mit den Burgfräuleins unterwegs? - Georg, schön dass ich dich treffe, ich wollte ... unn doo geht de Schorsch aach schunn rickwärts, de Hubert mett soim Knowwelochflade immer hinnerher - unn wenn doo nit de Woistond vom Mitter gewese wär, hätt de Hubert de Schorsch bis in de Moo gedriwwe.

Was wollder dann, de Hubert?, hott de Karl gefroocht, als de Schorsch widder bei uns war.

Dess waaß ich nit, moont de Schorsch, weil ich mich gefielt habb wie sellemols moin Pedder, de heilich Georch, wie den de Drache oogefaucht hott. Koo Wunner, dass dann de Georch gebrüllt hott, jetz hawwe die Bosse e Loch unn hott dem Drache oons mettem Speer in de Hals gemacht.

Doo mussde merr all lache, unn e bisje später, als merr noch e paar Leit mehr warn, weil aach de Hubert mett soim Nochber unn dem soi Fraa dezu kumme iss, hawwe merr enn Kreis gemacht unn hawwe iwwer alles Meechliche geschwetzt. Ich habb gesacht: Eigentlich iss joo koo Wedder ferr so enn Weihnachtsmarkt, weils zwölf Grad warm iss. Awwer trotzdem trink ich jetz enn Glihwoi!

Unn de Karl hott verzählt: Die Klimakatastrof dut halt aach vor Weihnachte nit halt mache, unn dess dut doo droo leie, weil uff de Welt immer mehr Gräser gefresse unn mehr Kräuter gegesse werrn unn die Lebewese deshalb so Methan-Gase ausstoße due, unn drum werrn merr bald wie im Treibhaus lewe. Awwer trotzdem ess ich jetz so enn Langgosch!

Unn weil die im östliche Deil von unserne Rund warme Knowwelochedunst ausgeadent unn die im westliche Deil heiße Glihwoidomp fortgeblose hawwe, hott die Paula gelacht: Wenn dess so iss mett dene Gase, dann werds nechstjohr noch e paar Grad wärmer. Trotzdem ess ich jetz e Brodworscht mett Kettchapp!

Doo ruft de Hubert: Hier gefällt's mir - das ist doch wieder ein dufter Weihnachtsmarkt!

Eiern Honnes